

卷三



書名 庾開府集十二卷 明新安汪氏刊本
 撰者 北周 庾信 撰, 明 汪士賢 校
 卷 卷三
 內容分類 集- 別集- 漢魏六朝- 北周
 索書號 仁井田- 集- N4002
 編號 D7114600

[彩色首頁1](#)

[東洋文化研究所漢籍目錄 編號: D7114600](#)

[東洋文化研究所漢籍目錄所載漢籍善本文影像資料庫 索書號: 仁井田- 集 N4002](#)

[漢籍善本文影像資料庫文本庾開府集十二卷 明新安汪氏刊本](#)
 版權所有: [東京大學 東洋文化研究所](#)

[使用上的注意事項](#)

庾開府集卷第一

賦

三月三日華林園馬射賦

并序

周 新野庾 信著
 明 新安汪士賢校

臣 堯以仲春之月刻玉而遊河舜以甲子之朝披
 巡洛夏后瑤臺之上或御二龍周王玄圃之前
 駿我大周之創業也南正司天北正司地平
 亂定三危之罪雲紀御官鳥司從職皇王有

M 1 2 3 4 5 6 7 8 9 10 1 2 3 4 5 6 7 8 9 10





庾開府集卷第三

周新野庾信著
明新安汪士賢校

詩

奉和泛江

藝文作王臺卿
以下五言

春江下白帝
畫舸向黃牛
錦纜回沙磧
蘭橈避荻洲
濕花隨水泛
空巢逐樹流
建平船楫下
荆門戰艦浮
岸社多喬木
山城足迴樓
日落江風靜
龍吟迴上游

奉和山池

梁簡文有
山池詩



度開府身卷三
樂宮多暇豫望苑暫迴輿鳴笳陵絕浪飛蓋歷通渠
桂亭花未落桐門葉半疎荷風驚浴鳥橋影聚行魚
日落含山氣雲歸帶雨餘

陪駕幸終南山和宇文內史

王山乘四載瑤池宴八龍
黿橋浮少海鵠蓋上中峰
飛狐橫塞路白馬當河衝
水奠三川石山封五樹松
長虹雙瀑布圓闕兩芙蓉
戍樓鳴夕鼓山寺響晨鐘
新蒲節轉促短筍籜猶重
樹宿含櫻鳥花留釀蜜蜂
迎風下列缺灑酒召昌容
且欣陪北上
方欲待東封

和宇文內史春日遊山

遊客值春輝金鞍上翠微
風逆花迎面山深雲濕衣
鴈持一足倚猿將兩臂飛
戍樓侵嶺路山村落獵圍
道士封君達仙人丁令威
煮丹於此地居然未肯歸

遊山一作遊仙

聊登玄圃殿更上增城山
不知高幾里低頭看世間
唱歌雲欲聚彈琴鶴欲舞
澗底百重花山根一片雨
婉婉藤倒垂亭亭松直豎

和宇文京兆遊田

小苑禁門開長楊獵客來懸知畫眉罷走馬向章臺
澗寒泉反縮山晴雲倒回熊饑自舐掌鴈驚獨銜枚
美酒餘杭醉一作芙蓉卽奉盃

奉報寄洛州

舟師會孟津甲子陣東隣雷轅礮戰鼓劍室動金神
幕府風雲氣軍門關塞人長旂析鳥羽合甲抱犀鱗
星芒一丈燄月暈七重輪黎陽水稍淥官渡柳應春
無庸奉天睽驅傳牧南秦繁詞勞簡牘雜俗弊風塵
上洛逢都尉商山見逸民留滯終南下唯當一史臣

奉報窮秋寄隱士

詩彙作王
襄詩非也

王倪逢啣缺桀溺偶長沮藜床負日卧麥隴帶經鋤
自然曲木几無名科斗書聚花聊飼雀穿池試養魚
小村治澁路低田補壞渠秋水牽沙落寒藤抱樹踈
空枉平原騎來過仲蔚廬

上益州上柱國趙王二首

銅梁影棠樹石鏡寫褰帷兩江如漬錦雙峰似畫眉
穿荷低晚蓋衰柳掛殘絲風流盛儒雅泉湧富文詞
無因同子淑暫得侍臨淄

寂寞歲陰窮蒼茫雲貌同鶴毛飄亂雪車轂轉飛蓬
鴈歸知向暖鳥巢解背風寒沙兩岸白獵火一山紅
願想懸鶉弊時嗟陋巷空

謹贈司寇淮南公

危邦久亂德天策始乘機九河聞誓衆千里見連旂
號亡垂棘返齊平寶鼎歸久弊風塵俗殊勞關塞衣
絆驥還千里垂鵬更九飛猶憐馬齒進應念節旄稀
迴軒入故里園柳始依依舊竹侵行徑新桐益幾圍
寒谷梨應重秋林栗更肥美酒還參聖雕文本入微

促歌迎趙瑟遊弦召楚妃小人司刺舉明敷集作實

濫吹南部治都尉軍謀假建威商山隱士石一作丹

水鳳凰磯野亭長被馬山城早掩扉傳呼擁絳節交

戟映彤闈遂今忘楚操何但食周薇三十六水變四

十九條非丹竈風煙歇年齡蒲柳衰同僚敢不盡疇

日懼難追

正旦上司憲府

詰日啓門闌繁辭湧筆端蒼鷹下獄吏獬豸飾刑官
司朝引玉節明載捧珠盤窮紀星移次歸餘律未殫

雪高三尺厚冰深一丈寒短筍猶埋竹香心未起欄
孟門久失路扶搖忽上搏栖鳥還得府棄馬復歸欄
榮華名義重虛薄報恩難枚乘還起疾貢禹遂彈冠
方垂蓮葉劍未用竹根丹一知懸象法誰思垂釣竿

任洛州酬薛文學見贈別

子居河之曲英彥本連蹤鹽形或變虎鼎氣乍成龍
若人承載德宮墻定數重五衢開辯路四照起文烽
日余濫推轂民願始天從上洛分都尉弘農開附庸
羊腸連九阪熊耳對雙峯白石仙人芊青林隱士松

北梁送孫楚西堤別葛龔故人倘書札黎陽土足封

將命至鄴酬祖正員

我皇臨九有聲教洎無隄興文盛禮樂偃武息氓黎
承乏驅騏驎旌旗事琬珪一作旌旃古碑文字盡荒
城年代迷被隴文瓜熟交媵香穗低投瓊實有慰報

李更無蹊

將命至鄴

按本傳信在梁爲通直散騎常待
聘于東魏文章辭令甚爲鄴下所
稱

大國脩聘禮親鄰自此敦張擅事原隰負辰報成言

西過犯風露北指度輾轅交歡值公子展禮覲王孫
何以譽嘉樹徒欣賦采繫四牢盈折俎三獻蒲罍樽
人臣無境外何由欣此言風俗既殊阻山河不復論
無因旅南館空欲祭西門眷然惟此別夙期幸共存

入彭城館

襄君前建國項氏昔稜威鴟飛傷楚戰鷄鳴悲漢圍
年一作世代殊垞俗風雲更盛衰水流浮磬動山喧雙
翟飛夏餘花欲盡秋近鷺將稀槐庭垂綠穗蓮浦落
紅衣徒知日云暮不見舞雩歸

同州還

赤岸繞新村青城臨綺門范睢新入相穰侯始出蕃
上林催獵響河橋爭渡喧竄雉飛橫澗藏狐入斷原
將軍高宴晚來過青竹園

從駕觀講武

校戰出長楊兵欄入闔場置陣橫雲起開營鴈翼張
門嫵磁石礙馬畏鐵菱傷龍淵觸牛斗繁弱駭天狼
落星奔驥駮浮雲上驪驪急風吹戰鼓高塵擁貝裝
駭猿時落木驚鴻屢斷行樹寒條更直山枯菊轉芳

一作豹略推全勝龍圖揖所長小臣欣寓目還知奉
會昌

奉報趙王出師在道賜詩

上將出東平先定下江兵彎弓一作伏石動振鼓沸
沙鳴橫海將軍號長風駿馬名雨歇殘虹斷雲歸一
鴈征暗巖朝石濕空山夜火明低橋澗底渡狹路花
中行錦車同建節魚軒異泊營軍中女子氣塞外夫
人城小人乖攝養岐路阻逢迎幾月芝田熟何年金
竈成哀笳關塞曲嘶馬別離聲王子身為寶深思不

倚衡

和趙王送峽中軍

樓船聊習戰白羽試撝軍山城對却月岸陣抵平雲
赤虵懸弩影流星抱劍文胡笳遙警夜塞馬暗嘶羣
客行明月峽猿聲不可聞

奉和趙王途中五韻

藝文云王褒作庾集載此疑誤收也

飄飄暎車幕出沒望連旗度雲還翊陣迴風卽送師
峽路沙如月山峯石似眉村桃拂紅粉岸柳被青絲
錦城遙可望迴鞍念此時

侍從徐國公殿下軍行

八風占陣氣六甲候兵韜置府仍張幕麾軍卽秉旄
長旗臨廣武烽火照成臯巡寒重挾纊酌水勝單醪
陣後雲逾直兵深星轉高電燄驅龍馬山精鏤寶刀
塞迥翻榆葉關寒落鴈毛旣得從神武何須念久勞

同盧記室從軍

樂府作
從軍行

河圖論陣氣金匱辨星文地中鳴鼓角天上下將軍
函犀恒七屬絡鐵本千羣飛梯聊度絳合弩暫凌汾
寇陣先中斷妖營卽兩分連烽對嶺度嘶馬隔河聞

箭飛如疾雨城崩似壞雲英王於此戰何用武安君

伏聞遊獵

虞旗喜日晴獵馬向山橫石關魚貫上山梁鴈翅行
雪平尋兔跡林藂聽雉聲馬嘶山谷響弓寒桑柘鳴
聞弦鳥自落望火獸空驚無風樹卽正不凍水還平
誰知茂陵下願入睢陽城

見征客始還遇獵

貳師新受詔長平正凱歸猶言乘戰馬未得解戎衣
上林遇逐獵宜春暨合圍漢帝熊猶憤秦王雉更飛

故人迎借問念舊始依依河邊一片石不復肯支機

奉和闡弘二教應詔

五明教已設三元法復開魚山將鶴嶺清楚兩邊來
香煙聚為塔花雨積成臺空心論佛性貞氣辨仙才
露盤高掌滴風鳥平翅迴無勞問一作訪待詔自識昆

明灰

至老子廟應詔

虛無推馭辨寥廓本乘蜺三門臨苦縣九井對靈谿
盛丹須竹節量藥用刀圭石似臨邛芋芝如封禪泥

籠毛新鵠小盤根古樹低野成孤煙起春山百鳥啼
路有三千別途經七聖迷唯一作行當別關吏直向流
沙西

奉和趙王遊仙

藏山還採藥有道得從師京兆陳安世成都李意期
王京傳相鶴太乙授飛龜白石香新芋青泥美熟芝
山精逢照鏡樵客值圍碁石紋如碎錦藤笛似亂絲
蓬萊在何處漢后欲遙祠

奉和同泰寺浮圖

和梁簡文帝

岩岩凌太清照殿比東京長影臨雙闕高層出九城
拱積行雲礙幡搖度鳥驚鳳飛如始泊蓮合似初生
輪重對月滿鐸韻擬鸞聲畫水流全住圖雲色半輕
一作露晚盤猶滴珠朝火更明雖連博望苑還接銀
沙城天香下桂殿仙梵入伊笙庶聞八解樂方遣六
塵情

奉和法筵應詔

五城隣北極百雉壯西昆鈎陳橫複道閭闔抵靈軒
千桂蓮花塔由旬紫桂園佛影胡人記經文漢語翻

星窺朱鳥牖雲宿鳳凰門新禽解雜嘯春柳卧生根
早雷驚蟄戶流雪長河源建始移交讓徽音種合昏
風飛扇天辯泉湧屬絲言羈臣從散木無以預中天
遙可望終類仰鷓弦

和從駕登雲居寺塔

一作和趙王
遊雲居寺

重巒千仞塔危磴九層臺石關恒逆上山梁乍斗迴
堦下雲峯出窓前風洞開隔嶺鍾聲度中天梵響來
平時欣侍從於此暫徘徊

和何儀同講竟述懷

無名卽講道有動定論機初學記安經讓禮席正業

理儒衣似得遊焉趣能同捨講歸石渠人少歇華陰

市暫稀秋雲低晚氣短景側餘輝螢排亂草出鴈捨

斷蘆飛別有平陵逕蕭條客鬢衰饑噪空倉雀寒鷺

懶婦機實欣懷諛問逢君理入微諛音小

奉和趙王隱士王褒同賦

洛陽徵五隱東都別二賢雲氣浮函谷星光集潁川

霸陵採樵路一作徑成都賣卜錢鹿裘披稍裂藜牀坐

欲穿阮籍唯長嘯嵇康訝一弦澗險無平石山深足

細泉短松猶百尺少鶴已千年野鳥繁弦嘒山花焰

火然洞風吹戶裏石乳滴窓前雖無亭長識終見野

人傳

擬詠懷二十七首

步兵未飲酒中散未彈琴索索無真氣昏昏有俗心

涸鮒常思水驚飛一作羽每失林風雲能變色松竹且

悲吟由來不得意何必往長岑

赭衣居傅巖垂綸在渭川乘舟能上月飛幘欲捫天

誰知志不就空有直如弦洛陽蘇季子連衡遂不連

既無六國印翻思二頃田

俎豆非所習帷幄復無謀不言班定遠應為萬里侯
燕客思遼水秦人望隴頭倡家遭強娉質子值仍留
自憐才智盡空傷年鬢秋

楚材稱晉用秦臣卽趙冠離宮延子產羈旅接陳完
寓衛非所寓安齊獨未安雪泣悲去魯悽然憶相韓
唯彼窮途慟知余行路難

惟忠且惟孝為子復為臣一朝人事盡身名不足親
吳起嘗辭魏韓非遂入秦壯情已消歇雄圖不復申

移住華陰下終為關外人

疇昔國士遇生平知己恩直言珠可吐寧知炭可一作

欲吞一顧重尺璧千金輕一言悲傷劉孺子悽愴史

皇孫無因同武騎歸守灞陵園

榆關斷音信漢使絕經過胡笳落淚曲羌笛斷腸歌
纖腰減束素別淚損橫波恨心終不歇紅顏無復多
枯木期填海青山望斷河

白馬向清波乘冰始渡河置兵須近水移營喜竈多
長坂初垂翼鴻溝遂倒戈的顱於此去虞兮柰若何

空營衛青塚徒聽田橫歌

北臨玄菟郡南戍朱鳶城共此無期別俱知萬里情
昔嘗遊今尹今時事客卿不特貧謝富安知死羨生
懷秋獨悲此平生何謂平

悲歌度燕一作易水弭節出陽關李陵從此去荆卿不

復還故人形影滅音書兩俱絕遙看塞北雲懸想關

一作天山雪遊子河梁上應將蘇武別

搖落秋為氣淒涼多怨情啼枯湘水竹哭壞杞梁城

天亡遭憤戰日蹙值愁兵直虹朝映壘長星夜落營

楚歌饒恨曲南風多死聲眼前一杯酒誰論身後名

周王逢鄭忿楚后值秦冤梯衝已鶴列冀馬忽雲屯

武安檐瓦振昆陽猛獸奔流星夕照鏡烽火夜燒原

古獄饒冤氣空亭多枉魂天道或可問微兮不忍言

橫流溝屯慝上塲結重氛哭市聞妖獸頽山起恠雲

綠林多散卒清波有敗軍智士今安用忠臣且未聞

惜無萬金產東求滄海君

吉士長為吉善人終日善大道忽云乖生民隨事蹇

有情何可豁忘懷固難遣麟窮季氏豈虎振周王圈

平生幾種意一旦衝風卷

六國始咆哮縱橫未定交欲競連城王翻徵縮酒茅
折骸猶換子登爨已懸巢壯水一作初開地盲風正
折膠輕雲飄馬足明月動弓梢楚師正圍鞏秦兵未
下嶠始知千載內無復有申包

橫石三五片長松一兩株對君俗人眼真興理當無
野老披荷葉家童掃栗跔竹林千戶封甘橘萬頭奴
君見愚公公真言此谷愚

日晚荒城上蒼茫餘落暉都護樓蘭返將軍踈勒歸

馬有風塵氣人多關塞衣陣雲平不動秋蓬卷欲飛
聞道樓船戰今年不解圍

尋思萬戶侯中夜忽然愁琴聲遍屋裏書卷滿牀頭
雖言夢蝴蝶定自非莊周殘月如初月新秋似舊秋
露泣連珠下螢飄碎火流樂天乃知命何時能不憂

憤憤天公曉精神殊乏少一郡催曙鷄數處驚眠鳥
其學乃于于其憂惟悄悄張儀稱行薄管仲稱器小
天下有情人居然性靈天

在死猶可忍爲辱豈不寬古人持此性遂有不能安

其面雖可熱其心長自寒匣中取明鏡披圖自照看
幸無侵餓理差有犯兵欄擁節時驅傳乘亭不據鞍
代郡蓬初轉遼陽桑欲乾秋雲粉絮結白露水銀團
一思探禹穴無用鑿臯蘭

倏忽市朝變蒼茫人事非避讒應采葛忘情遂食薇
懷愁正搖落中心愴有違獨憐生意盡空驚槐樹衰
日色臨平樂風光滿上蘭南國美人去東家棗樹完
抱松傷別鶴向鏡絕孤鸞不言登隴首唯得望長安
鬪麟能食日戰水定驚龍鼓鞞喧七萃風塵亂九重

鸚湖去無返蒼梧悲不從徒勞銅雀妓遙望西陵

無悶無不悶有待何可待昏昏如坐霧漫漫疑行海

千年水未清一代人先改昔日東陵侯唯見瓜園

懷抱獨惛惛平生何所論由來千種意併是桃花源

穀皮兩書帙壺盧一酒樽自知費天下也復何言

蕭條亭障遠悽慘風塵多關門臨白狄城影入黃河

秋風別蘇武寒水送荆軻誰言氣蓋世晨起帳中

被甲陽雲臺重雲久未開鷄鳴楚地盡鶴唳秦軍來

羅梁猶下礮楊排久飛灰出門車軸折吾王不復回

和張侍中述懷

陽窮乃悔吝世季誠屯剥奔河絕地維折柱傾天角
成羣海水飛如雨天星落負鍾遂移山藏舟終去壑
生民忽已魚君子徒爲鶴疇昔逢知己生平荷恩渥
故組竟無聞程嬰空寂寞永嘉獨流寓中原惟鼎鑊
道險卧榼櫛身危累素殼漂流從木梗風卷隨秋籜
張翰不歸吳陸機猶在洛漢陽錢遂盡長安米空索
時占季主龜乍販韓康藥伏轅終入絆垂翅猶離繳
徒懷琬琰心空守黃金諾號鄆終無寄齊秦竟何託

大夫唯閔周君子常思毫寂寥兵羈旅蕭條同負郭

農談止穀稼野膳唯藜藿操樂楚琴悲集作澁忘憂魯

酒薄渭濱觀坐釣谷口看秋穫唯有丘明耻無復榮
期樂夷則火星流天根秋水涸冬嚴日不暖歲晚風
多朔楊浮有恠雲細凌聞災電木皮三寸厚涇泥五
斗濁雖忻曲轅樹猶懼雕陵鵲生涯實有始天道終
虛橐且悅善人交無疑朋友數何時得雲雨復見翔
寥廓

奉和示內人

然香鬱金屋吹管鳳凰臺春朝迎雨去秋夜隔河來
聽歌雲卽斷聞琴鶴倒回春窻刻鳳下寒壁畫花開
定取流霞氣時添承露杯

奉和趙王美人春日

直將劉碧玉來過陰麗華祗言滿屋裡併作一園花
新藤亂上格春水漫吹沙步搖釵梁動紅輪被一作輪帔
角斜今年逐春處先向石崇家

奉和趙王春日

城傍金谷苑園裏鳳凰池細管調歌曲長衫教舞兒

向人長曼臉由來薄面皮梅花絕解作樹葉本能吹
香煙龍口出蓮子帳心垂莫畏無春酒須花但見隨

夢入堂內

雕梁舊刻杏香壁本泥椒幔繩金麥穗簾鈎銀蒜條
畫眉千度拭梳頭百遍撩小衫裁褱臂纏絃摺抱腰
日光釵燄動窻影鏡花搖歌曲風吹韻笙簧火炙調
卽今須戲去誰復待明朝

和詠舞

梁簡文有詠舞詩

洞房花燭明燕餘雙舞輕頓履隨踈節低鬟逐上聲

步轉行初進衫飄曲未成鸞迴鏡欲滿鶴顧市應傾
已曾天上學詎是世中生

夜聽搗衣

秋夜搗衣聲飛度長門城今夜長門月應如晝日明
小鬟宜粟瑱圓腰運織成秋砧調急節亂杵變新聲
石燥砧逾響桐虛杵絕鳴鳴石出華陰虛桐採鳳林
北堂細腰杵南市女郎砧擊節無勞鼓調聲不用琴
並結連枝縷雙穿長命針倡樓驚別怨征客動愁心
同心竹葉椀雙去雙來滿裙裾不柰長衫袖偏宜短

龍文鏤剪刀鳳翼纏窠管風流響和韻哀怨聲悽斷
新聲繞夜風嬌轉滿空中應聞長樂殿判徹昭陽宮
花鬟醉眼纈龍子細文紅濕相通夕露吹衣一夜風
玉堦風轉急長城雪應闇新綬始欲縫細錦行須纂
聲煩廣陵散杵急漁陽搯新月動金波秋雲泛濫過
誰憐征戍客今夜在交河栩陽一作離別賦臨江愁
思歌復今悲此曲紅顏餘幾多

預麟趾殿校書和劉儀同

止戈興禮樂修文盛典謨壁開金石篆河浮雲霧圖

芝香上延閣碑石向鴻都誦書徵博士明經拜大夫
璧池寒水落學市舊槐疎高譚變白馬雄辯塞飛狐
月落將軍樹風驚御史烏子雲猶汗簡溫舒正削蒲
連雲雖有閣終欲想江湖

和宇文內史入重陽閣

北原風雨散南宮容衛踈待詔還金馬儒林歸石渠
徒懸仁壽鏡空聚茂陵書竹淚垂秋筍蓮衣落夏集
故渠顧成始移廟陽陵正徙居舊蘭憔悴長殘花爛
熯舒别有昭陽殿長悲故一作班婕妤

忝在司水看治渭橋

大夫叅下位司職渭之陽富平移鐵鑠一作鑠柱甘泉運
石梁跨虹連絕岸浮龍續斷航春洲鸚鵡色流水桃
花香星精逢漢帝釣叟值周王平隄石岸直高堰柳
陰長羨言杜元凱河橋獨舉觴

北園新齋成應趙王教

虹粉跂鳥翼山節拱蘭枝畫梁雲氣繞彫窓王女窺
月懸唯返照蓮開長倒垂盤根紐壞石行雨暴澆池
長藤連格徙高樹帶巢移鳥聲唯雜曲花風直亂吹

白虎題書觀玄熊帖射皮文弦入舞曲月扇掩歌兒
玉節調笙管金船代酒卮若論曹子建天人本共知

同會河陽公新造山池聊得寓目

橫階仍鑿澗對戶卽連峰暗石疑藏虎盤根似臥龍
沙洲聚亂荻洞口礙橫松引泉恒數派開巖卽十重
北閣聞吹管南鄰聽擊鍾菊寒花正合杯香酒絕濃
由來魏公子今日始相逢

登州中新閣

跨虛凌倒景連雲詎少陽璇極龍鱗上雕甍鵬翅張

千尋文杏照十里木蘭香開窓對高掌平坐望河梁
歌響聞長樂鍾聲徹建章賦用王延壽書須韋仲將
龍來隨畫壁鳳起逐吹簧石作芙蓉影池如明鏡光
花梁反披葉蓮井倒垂房徒然思鷺賀無以預鷓翔
歲晚出橫門

年華改歲陰遊客喜登臨據鞍垂玉帖橫腰帶錦心
冰弱浮橋沒沙虛馬跡深倚弓依石岸回牀向柳陰
智瓊來勸酒文君過聽琴明朝雲雨散何處更相尋
北園射堂新成

軒臺聊可習仙的不難登轉箭初調箭橫弓先望壘
驚心一鴈落連臂兩猿騰直知王濟巧誰覺魏舒能
空心不死樹無葉未枯藤擇賢方至此傳卮欣得朋

庾開府集卷第三終

庾開府集卷第四

周 新野庾 信著

明 新安汪士賢校

詩

園庭

杖鄉從物外養學事閑郊窮愁方汗簡無遇始觀爻
谷寒已吹律簷空更剪茆樵隱恒同路人禽或對巢
水蒲開晚結風竹解寒苞古槐時變火枯楓乍落膠
倒屣迎懸榻停琴聽解嘲香螺酌美酒枯蚌藉蘭葭